



Stølsheimen
verneområdestyre

Møteinnkalling

Utval: **Stølsheimen verneområdestyre**
Møtestad: Teams
Dato: 07.04.2026
Tidspunkt: 14:00

Eventuelt forfall må meldast snarast til verneområdeforvaltar. Vararepresentantar møter etter nærare beskjed.

Andre orienteringar: Avtalen med Nils Kvamme er forlenga for 1 år

Saksliste

Utvalgs- saksnr	Innhold	Lukket	Arkiv- saksnr
ST 7/26	Godkjenning av innkalling og dagsorden		
ST 8/26	Val av styremedlem til å skrive under protokollen		
ST 9/26	Orienteringar og referatsaker		
RS 4/26	Planleggingsmøte 2026 - Stølsheimen landskapsvernområde - skjøtselsarbeid i kulturlandskapet - Nils Kvamme		2023/18310
RS 5/26	Løyve - Delegert vedtak - Stølsheimen landskapsvernområde - Rappen - motorferdsel - Sjur Vikøren		2026/5316
RS 6/26	Løyve - Delegert vedtak - Stølsheimen landskapsvernområde - Skjervheims-Grøndalen - motorferdsel - Edvin Skjerven		2026/6123
RS 7/26	Løyve - delegert vedtak - Stølsheimen landskapsvernområde - Sendedalen - motorferdsel - snøscooter		2026/5080
RS 8/26	Løyve - Stølsheimen landskapsvernområde - Sendedalen - motorferdsel - snøscooter		2026/5080
ST 10/26	Saksframlegg - Stølsheimen landskapsvernområde - Mørkves-Grøndalen - tiltak ved stølshus - 277/1		2024/13237

ST 7/26 Godkjenning av innkalling og dagsorden
ST 8/26 Val av styremedlem til å skrive under protokollen
ST 9/26 Orienteringar og referatsaker
RS 4/26 Planleggingsmøte 2026 - Stølsheimen landskapsvernområde - skjøtselsarbeid i kulturlandskapet - Nils Kvamme
RS 5/26 Løyve - Delegert vedtak - Stølsheimen landskapsvernområde - Rappen - motorferdsel - Sjur Vikøren
RS 6/26 Løyve - Delegert vedtak - Stølsheimen landskapsvernområde - Skjervheims-Grøndalen - motorferdsel - Edvin Skjerven
RS 7/26 Løyve - delegert vedtak - Stølsheimen landskapsvernområde - Sendedalen - motorferdsel - snøscooter
RS 8/26 Løyve - Stølsheimen landskapsvernområde - Sendedalen - motorferdsel - snøscooter



Arkivsaksnr: 2024/13237-10

Sakshandsamar: Maria Alarcon Underdal

Dato: 31.03.2026

Utval	Utvalssak	Møtedato
Stølsheimen verneområdestyre	10/26	07.04.2026

Saksframlegg - Stølsheimen landskapsvernområde - Mørkves-Grøndalen - tiltak ved stølshus - 277/1

Innstilling frå forvaltar

Stølsheimen verneområdestyre gjev avslag på søknad om platting utanfor stølshuset i Mørkves-Grøndalen. Vedtaket er gjort med heimel i verneforskrifta for Stølsheimen punkt IV nr. 1. og naturmangfaldlova (nml.) § 48 fyrste ledd og fyrste alternativ.

Vedtaket er samtidig å rekna som eit pålegg om retting av tiltaket, jf. naturmangfaldlova § 69. Tiltaket skal rettast innan 1. november 2027. Rettinga inneber å fjerne treplatingen utanfor stølshuset og fjerne materialet frå området.

Stølsheimen verneområdestyre gjev løyve til å leggje nokre større steinar frå området der plattingen ligg no, og la dei drenerande småsteinane som alt er lagt på kvar side av stølshuset få ligge. Løyve er gjevne med heimel i naturmangfaldlova § 48 fyrste ledd og fyrste alternativ.

Løyvet er gjevne med fylgjande vilkår:

- Dei to partia med lokal småstein for drenering kan få ligge slike dei er lagt, og skal bli grodd til naturleg med vegetasjon så det blir tilsvarande landskapet rundt
- Det kan plukkast større stein frå området for å leggje ved hytta som steinheller der plattingen er no
- Stein skal plukkast så det ikkje er skjemmande og skal ikkje takast frå gamle murar eller anna kulturminne
- Det skal ikkje gjerast anna tiltak i form av planering og drenering utan at dette er omsøkt på førehand
- Det skal sendast rapport med bilete av utført tiltak innan 1. november 2027



Saksopplysningar

Dokument i saka:

- Tilleggsinformasjon søkjar, 25.03.2026
- Justert søknad, 4.2.2025
- Tilbakemelding frå Stølsheimen verneområdestyre, 19.12.24
- Søknad frå *Kjetil Mørkve*, 31.10.2024
- Utsett frist for svar på førehandsvarsel, *Stølsheimen verneområdestyre*, 17.10.2024
- Søknad om utsett frist for uttale, *Kjetil Mørkve*, 30.09.2024
- Førehandsvarsel – Stølsheimen landskapsvernområde – Mørkves-Grøndalen – Tiltak ved stølshus – 277/1, *Stølsheimen verneområdestyre*, 19.09.2024
- Rapport frå SNO, 16.08.2024

Dokument som bakgrunn for saka:

- Avslag – Stølsheimen landskapsvernområde – Mørkves-Grøndalen – opptrekksrampe ved naust, 2024/13557, 11.11.2024
- Delegert sak - Dispensasjon - Stølsheimen landskapsvernområde - Solrenningane - avtrapping på turisthytte - Bergen og Hordaland turlag, saksnr. 2020/12328, 14.8.2020
- Rapport frå oppsyn - Stølsheimen landskapsvernområde – Hallsetdalen, 26.09.2019
- Stølsheimen landskapsvernområde – melding om vedtak - sittebenk ved turisthytta på Selhamar, saksnr. 2016/759, 15.03.2016
- Avslag - Stølsheimen landskapsvernområde - platting ved turisthytta i Åsedalen, saksnr. 2015/1858, 29.06.2015

Søknaden vert vurdert etter:

- Verneforskrift for Stølsheimen landskapsvernområde 21.12.90
- Forvaltningsplan for Stølsheimen landskapsvernområde, rapport nr. 1-2017
- Spor etter stølsdrift i Stølsheimen landskapsvernområde (stølsrapporten), rapport nr. 4 – 2011 (*Fylkesmannen i Sogn og Fjordane*)
- Naturmangfaldlova av 19. juni 2009
- Rundskriv om forvaltning av verneforskrifter, rettleiar M106-2014, Miljødirektoratet
- Oppfølging av ulovlige forhold i verneområder, rettleiar M-2692-2024, Miljødirektoratet

Bakgrunn for saka

Stølsheimen verneområdestyre sende førehandsvarsel om retting av tiltak ved stølshuset til Mørkve i Mørkves-Grøndalen 19.09.2024. Brevet vart sendt ut etter verneområdestyre fekk rapport frå SNO med bilde av tiltaket som var utført ved stølshuset i Mørkves-Grøndalen. Tiltaket er ein treplatting på vestsida av bygget. I kvar ende av plattingen er det bygd opp ein steinhaug for å jamne ut terrenget. Det er ikkje søkt om dette tiltaket. I førehandsvarselet vart det varsla om pålegg om retting som innebar fylgjande:

- Fjerning av treplatting
- Steinhaugen i sørenden av treplattingen skal flyttast tilbake til området der steinen er plukka frå.
- Området framfor stølshuset skal ryddast for materiale, og terrenget skal tilbakeførast til slik det var før tiltaket vart gjennomført.



Det vart sett frist til å koma med utale til varselet innan 01.10.2024, og frist for retting av tiltaket vart sett til 01.11.2024. Etter søknad frå Mørkve om utsetting av fristen, gav styret ny frist til utale til 01.11.2024. Fristen for retting vart oppheva i påvente av uttalen.



Figur 1. Bilde av treplattingen ved stølshuset i Mørkves-Grøndalen. Foto SNO



Figur 2. Bilde av treplattingen ved stølshuset i Mørkves-Grøndalen. Foto SNO



Figur 3. På kartet er stølshuset i Mørkves-Grøndalen markert med blå sirkel. Kjelde fylkesatlas



Søknaden 31.11.24

«Søknad om nedfelt plating ved sel i Mørkves-grøndalen for kjetil Mørkve


Søker om plating i framkant av hytte, bredde 350cm, og lengde ut frå hytta 165cm.
Det er kun topp av bord som viser, resten vert nedfelt i terrenget.

Rund hytta er det vert veldig ulendt terreng og det er ikkje noko plass å kunne sette opp stol og bord, dette er greit og kunne gjer sommarsdagen, og er minimert slik at det kun er plass til 4 stoler

Det er problem med stort vass-sig under hytta, noko som har ført til at den frys opp på vinteren, og søylene har måttast blitt støypt på nytt pga av dette. Litt av formålet til platingen er og hindra is framfor hytta, og forbedra drenering ,difor er det brukt 2 parti med stein

På våren er den veldig bløtt og gjørmete forran hytta i snøsmeltinga , og det blir trødd sundt , då ein går over dette partiet når ein skal til toalettet og må nytta støvlar.

Med denne platingen vil ein kunne ha det reint og fint heile året, sleppe og nytta støvler ved toalettet besøk , bedre drenering under hytta, og ha mulighet sette opp ein stol, i tillegg er den på ingen måte til sjenanse for nokon,»





Justert søknad 4.2.25

Etter oppmoing frå styret om å vurdere andre løysingar som til dømes steinheller kom det inn ein justert søknad. Men søkjar ynskjer eigentleg original søknad med platting behandla.

«Søknad om og legge stein / heller utforbi stølshus i Mørkvesgrøndalen Søker med dette om og legge stein /heller utforbi stølshus tilhøyrande Bruk 277/1 Arealet er 3,50 x 1.65 og er som vist på tidlegger innsendt teikning, sør vest for hytta Søker i tillegg om og la parti med stein ligge , då dette er for og drenere vekk vatn frå søylepunkt under hytte»

Tilleggsinformasjon som kom med justert søknad:

« Sender her vedlagt ny justert søknad. Men håpar og reknar med at det vert godkjent slik den første forelegg. Meg bekjent er det fleire hytter som har plating både privat og turistforeningen, kva vert gjort med desse skal ikke alle behandlast likt ? Hytta til DNT i Solrenningen har plating på 2 sider og i tillegg løfta opp fra bakken, skal denne drivast i sommar? Skal me som grunneigara fjerne bruer som er av treverk noko som ikke høyrer til i området fra gammalt av? Hytta vår vart flytta i 1996 pga av at det driv ei grop rundt hytta og ved stor snøsmelting og mykje vatn braut elva opp og det vart fylt med vatn , hadde ein meter med vatn inne i hytta 2 gonger . Etter at den vart flytta lenger opp i terrenget driv det fortsatt grop rundt og bekk fra oppsida av hytta har komt inn og fylt med vatn til likt med golv i vedhus fleire gonger, litt av tanken med treverk er at det skal virka som ein Sluk ut fra gropa og hindre at vatnet stig opp til nivå på hytta , dette kom ikke fram i forrige søknad. Om så skulle skje må eg jo berre informera forsikringselskapet om at her har vert prøvd og gjort tiltak som at blitt avvist. Minner og om at når området vart verna i 1990 blei det sagt at det ikke skulle få noko betydning for grunneigarane, i Voss kommune er det lov og bygga plating ved stølshus, det står heller ikke i verneforskriftene at det ikke er lov Håpar i tillegg at vedtak om fjerning av opptreksrampe foran naust vert endra, slik at de fortsatt går å få opp ein tung trebåt å leine. Vatnet har pr i dag alt for mykkje fiska og når i tillegg vernestyret hindrar tiltak som burde vert ein selvfølge forsvinner både motivasjonen og lysta til og prøva og gjer noko med det. Er 2 små tiltak som etter mitt syn er eit led i og ta vare på bygningar og området. Men viss målet til styret er og driva vekk grunneigarar og legge til rette for masseturisme er det i ferd med og lukkast».

Dialog våren 2026:

I dialog mellom søkjar og forvaltar kom det tydeleg fram at søkjar ynskjer original søknad om å behalde plattingen behandla også. Det vart lagt fram ynskje om å vise bilete av plattingen utanfor turisthytta ved Solrenningane.



Figur 4: Turisthytta ved Solrenningane

Lovgrunnlaget

«Føremålet med vern av Stølsheimen er å ta vare på eit særmerkt og vakkert vestlandsk fjell- og fjordlandskap med kulturminne, kulturlandskap og naturmiljø som er lite påverka av tekniske inngrep, samstundes som området skal kunne nyttast til landbruk, friluftsliv, jakt og fiske» jf. verneforskrifta for Stølsheimen landskapsvernområdet pkt. III.

Jamfør verneforskrifta punkt IV nr.1. er det forbod mot alle inngrep som vesentleg endrar landskapet art eller karakter;

«så som oppføring av bygningar, anlegg og faste innretningar, fjerning eller inngrep i faste kulturminner frå nyare tid, så som bygningar, vegar, gamle kve m.m., framføring av luftleidningar, bygging av vegar, drenering, og anna form for tørlegging, uttak, oppfylling, planering og lagring av masse, bergverksdrift, vassdragsregulering, attlegging av avfall, gjødsling og bruk av kjemiske middel, utslepp av konsentrerte forureiningstilførsler mv. Opplistinga er ikkje uttømmende».

Verken platting eller drenering ved stølshus er nemnt i dei spesielle dispensasjonsreglane i forskrifta. Det nærmaste ein finn i samband med plattingar er at det jamfør verneforskrifta punkt VI nr.2. kan bli gitt løyve til:

«Oppføring av gjetarhytter, buer og naust, og andre bygg i samband med landbruksdrift, tilpassa tradisjonelt bygningsmiljø på staden».

Platting er ikkje tradisjonelt i stølsmiljøa og tiltaket kan derfor ikkje vurderast etter forskrifta. Både plattingen og dei drenerande massane må difor vurderast etter naturmangfaldslova § 48.

Naturmangfaldslova § 48 seier:



«Forvaltningsmyndigheten kan gjøre unntak fra et vernevedtak dersom det ikke strider mot vernevedtakets formål og ikke kan påvirke verneverdiene nevneverdig, eller dersom sikkerhetshensyn eller hensynet til vesentlige samfunnsinteresser gjør det nødvendig.»

I denne saka må det difor vurderast om tiltaket er i strid med føremålet i vernevedtaket og om det kan påverka verneverdiane negativt. Begge delsetningane må vere oppfylt.

Rundskrivnet om forvaltning av verneforskrifter frå Miljødirektoratet beskriv korleis § 48 er meint å nyttast:

«Dispensasjonsbestemmelsen er i utgangspunktet ment for uforutsette tilfeller eller spesielle/særlige tilfeller som ikke ble vurdert ved opprettelsen av verneområdet, i første rekke bagatellmessige inngrep eller forbigående forstyrrelser. § 48 første alternativ dekker tilfeller hvor verneformålet og verneverdiene tåler enkeltstående avvik fra vernebestemmelsene.»

I forvaltningsplanen for Stølsheimen landskapsvernområde (rapport nr. 1-2017) står det fylgjande om tiltak i eit stølsområde:

«Ved at stølshusa vert meir nytta i fritidssamanheng enn tidlegare, er det ynskje om meir tilrettelegging på utsida av bygningane med terrassar, plattingar og inngjerding. Det er ikkje opna for slike tiltak i verneforskrifta, og sakene må vurderast etter nml. § 48. På stølane i Stølsheimen er det ikkje tradisjon for platting, terrasse eller inngjerding, og som hovudregel vil det ikkje verta gjeve løyve til slike tiltak.»

Naturmangfaldlova kapittel IX regulerer handheving og sanksjonar ved tiltak som er i strid med verneforskrifta. Forvaltningsstyresmakta kan ved brot på verneforskrifta krevje at den ansvarlege rettar eller stansar tilhøve som er i strid med verneforskrifta, sjå naturmangfaldlova § 69 første avsnitt.

Etter naturmangfaldlova § 7 skal prinsippa i §§ 8 – 12 leggjast til grunn ved utøving av offentleg mynde, og det skal koma fram av vedtaket korleis prinsippa er vurdert og vektlagt i saka.

Vurdering

Stølen Mørkves-Grøndalen ligg 885 m.o.h. på nordsida av Grøndalsvatnet, og var sommarstøl for Mørkvegardane og gardar i Vik jamfør rapporten «spor etter stølsdrift i Stølsheimen». Denne rapporten registrerte fem bygningar, to tradisjonelle sel over fjøs, to nyare bygningar med meir hyttepreg som sannsynlegvis har erstatta tidlegare sel, og ein grunnmur. Alle bygningene er godt synlige og fire har tak av metall. Stølsbygningen som gjeld denne saka er av dei nyare bygningane, har torvtak og står litt utanfor hovudselbøen nordaust for vatnet.

Det er berre Mørkve som har sauer på beite i dette området. Det er av stor verdi at stølen vert brukt i landsbrukssamanheng med beitedyr for å ta vare på kulturlandskapet på stølen. For at bygningane skal bli tatt vare på, er det samtidig viktig at bygga kan nyttast også i fritidssamanheng. Det er forståeleg at eigaren ynskjer å gjera tiltak for å kunne betre utearealet. Men bygging av plattingar, gjerder og større trapper rundt hytter og stølshus i stølsområda er generelt ikkje ynskjeleg i Stølsheimen landskapsvernområde, då det bryt med tradisjonell byggeskikk.



I verneforskrifta for Stølsheimen landskapsvernområde er kulturminne og kulturlandskap ein del av verneføremålet. Verneforskrifta har ikkje reglar som opnar for bygging av treplattingar framfor stølshus. Det må vurderast om det er heimel i naturmangfaldslova § 48 til å vurdere denne saka. Etter § 48 i naturmangfaldlova må det vurderast om tiltaket strider mot formålet med vernet eller kan påverke verneverdiane nemneverdig. Stølsheimen landskapsvernområde er verna for å ta vare på eit vakkert og eigenarta natur- og kulturlandskap med eit mangfaldig dyreliv. Området er verna mot alle inngrep eller tiltak som vesentleg kan endre eller verke inn på landskapets art eller karakter og påverke verneverdiane negativt. Dette tiltaket er eit mindre tiltak som kan reknast som eit bagatellmessig tiltak i seg sjølv, jamfør rundskriv om forvaltning av verneforskrifter, kap. 7.2. Forvaltar vurderer at det er heimel for å vurdere søknaden etter naturmangfaldslova § 48 fyrste ledd og fyrste alternativ. Men ein må gjere ei grundig vurdering av nml. § 8-12 og om den samla belastninga i ein større samanheng kan vere til skade for verneverdiane og slik i konflikt med verneføremålet.

Kunnskapen om natur- og kulturlandskapet i Mørkves-Grøndalen er henta frå verneplanarbeidet, forvaltningsplanen for Stølsheimen, og rapporten «spor etter stølsdrift i Stølsheimen». Det er ikkje kjente førekomstar av trua naturtypar i området, men stølen er innanfor Fjellheimen villreinområde. Mørkves-Grøndalen er registrert som kalvingsområde og som barmarksbeite for villrein (Naturbase 30.3.2026). Tiltaka i søknaden vil lite truleg føra til endra bruk av området slik at det kan få negativ verknad på villreinen. Det er ikkje registrert andre sårbare artar i dette området som vil verta påverka av tiltaka. Stølshuset til Mørkve er ikkje registrert som freda bygg. Kunnskapsgrunnlaget jamfør nml. § 8 er vurdert som godt nok for å vurdere denne saka, og føre-var-prinsippet jamfør nml. § 9 er ikkje vektlagt i saka. Vestland fylkeskommune er ikkje blitt bedt om å kome med uttale i saka då bygget ikkje er eit kulturminne. Ut i frå kunnskapsgrunnlaget er det ikkje grunn til å tru at tiltaka vil kunne føre til skade på naturmangfaldet jamfør nml. § 11.

I Stølsheimen er stølsområda ein viktig del av kulturlandskapet, og bygningane er ein viktig del av kulturmiljøet på ein støl. I verneforskrifta punkt VI, nr. 2, står det at det kan gjevast løyve til oppføring av m.a. gjetarhytter og andre bygg i samband med landbruksdrift, men at det skal vere tilpassa tradisjonelt bygningsmiljø på staden. Det er ikkje vanleg med treplattning framfor stølshus i stølsområda. Ved andre bygg i Stølsheimen som har tilknytning til eit stølsmiljø har det vore meir vanleg å leggje nokre stein frå området utanfor stølshusa. Dette er eit enkelt og meir tradisjonelt tiltak, og ein løysing som passar betre inn i landskapet, jamfør. Nml. § 12. Plattningar passar ikkje inn i det tradisjonelle bygningsmiljøet på stølar i Stølsheimen, og i forvaltningsplanen er det retningslinjer som tilseier at det ikkje bør setjast opp slike byggetiltak ved stølshusa. Søkjar har skissert fleire behov i søknaden; ein uteplass i sola, drenering ved hytta og betre framkomelegheit rundt hytta for å unngå at terrenget vert nedtrakka i våte parti. Desse behova kan dekkjast med å leggje nokre større steinar og ved å få behalde dei drenerande massane som er vist på bileta i denne saka. Steinar frå området som steinheller og nokre drenerande masser er vurdert å vere ein betre og meir tradisjonell metode for å sikre behova til søkjar. Dei drenerande massane vil hjelpe på eit stort og viktig problem for søkjar, samstundes som lokal stein vil etterkvart gli inn i landskapet att ettersom det vert delvis tilgrodd med vegetasjon rundt.



Denne eine plattingen ved dette stølshuset er i seg sjølv ikkje eit stort inngrep, og vil ikkje aleine påverka landskapet sin art og karakter vesentleg. Det vil difor heller ikkje aleine stride med verneføremålet. Utfordringa med å gje løyve til dette tiltaket, er at det vil gje stor presedens for andre stølshus i Stølsheimen landskapsvernområde. Opnar ein opp for denne type tiltak vil det gje presedens for likande tiltak utanfor stølshusa. Det er mange privateigde stølshus i verneområdet, og mange av stølshusa vert i dag nytta i fritidssamanheng. Det er stor sjanse for at det er mange som vil søkja om å få sette opp terrasse/platting ved stølshuset om ein opnar for dette. Samla sett vil utvidingar med terrassar og plattingar ved stølshusa kunne endra landskapet sin art og karakter vesentleg, og med det vera i strid med verneføremålet. Derimot er det alt praksis for å leggje nokre steinar rundt stølshus for å få eit reinare uteareal ved stølshuset, og denne metoden er meir passande i eit stølsmiljø. Vidare vil nokre små haugar med lokal stein for å drenere ved sensitive punkt ved hytta vere eit tiltak som er litt spesiell for denne hytta som har ei særeigen historie med problem i forhold til vassføring rundt hytta. Desse to sistnemnde tiltaka vil derfor kunne kallast bagatellmessige og ikkje føre til ein presedens som vil påverke verneverdiane nemneverdig og vil da ikkje vere i strid med føremålet for vernet. Forvaltninga skal vurdere den samla belastninga eit tiltak vil få på økosystemet og naturverdiane jamfør. nml. § 10. I dette tilfellet er det den samla belastninga på kulturlandskapet og kulturminne som er relevant og som har vorte vurdert.

I denne saka er det også aktuelt å vurdere korleis tidlegare saker påverkar presedensvurderinga for denne søknaden. Det finst plattingar eller tilrettelegging utanfor turisthytter i Stølsheimen, som ved turisthyttene ved Solrenningane og Selhamar. At Stølsheimen skal kunne nyttast til friluftsliv er eit viktig føremål i verneforskrifta, og forskifta opnar opp i dei spesifikke dispensasjonsreglane for moglegheita til å gje løyve til oppføring, utviding og ombygging av turisthytter for allmenn bruk jamfør verneforskrifta punkt VI nr. 4. Desse tiltaka skal ikkje gje presedens til private stølshus da det er opning i forskrifta til å vurdere løyve i samband med turisthytter. I tillegg har dette vore begrensa i tidlegare saker ved at det er lagt vekt på at turisthyttene bør liggje for seg sjølv, og ikkje vere ein del av eit tradisjonelt stølsmiljø for å få løyve til liknande tiltak. Verneområdestyret har difor gitt avslag til bygging av platting rundt turisthytta i Åsedalen, med grunngjeving at det ville vere eit framandelement i stølslandskapet da hytta ligg i nærheita av dei andre stølshusa der. I vurderinga fekk dei oppmoding om at tilrettelegging av uteplass ved hytta med nokre steinar frå området ville vera betre tilpassa tradisjonell byggeskikk og landskapet på stølen. I samband med ein tidlegare rapport frå oppsynet, vart det observert ein platting/terrasse i Hallsetdalen ved eit privat stølshus. Dei vart da oppmoda om å fjerne den, og det vart gjort. Med bakgrunn i denne praksisen opnar det ikkje opp for å gi løyve til platting ved stølshuset slik det vert søkt om. Rampa ved naustet i Mørkves-Grøndalen som vart rapportert om på same tid som omsøkt platting, fekk vedtak om avslag i november 2024.

Konklusjon

Etter ei samla vurdering av naturmangfaldlova §§ 8-12 og verneforskrifta for Stølsheimen, meiner forvaltar at å opne for å tillate plattingar utanfor stølshus vil kunne ha verknad på landskapets art og karakter, og er med det i strid med verneføremålet for Stølsheimen landskapsvernområde. Plattingen er ikkje tilpassa det tradisjonelle bygningsmiljøet på stølar i Stølsheimen, og vil kunne gje presedens for liknande saker. Forvaltar innstiller på avslag for



tiltaket med heimel i verneforskrifta for Stølsheimen landskapsvernområde punkt IV nr. 1, og naturmangfaldlova § 48 fyrste ledd og fyrste alternativ.

På bakgrunn av vurderingar etter nml. §§ 8-12 og verneforskrifta, meiner forvaltar tiltaket med å leggje lokale steinar som heller der plattingen no står, og å la drenerande steinhangane få liggje ikkje er i strid med verneverdiane og verneføremålet, og vurderer det er heimel i naturmangfaldlova § 48 fyrste ledd og fyrste alternativ til å gje løyve til dette.